

Jü Carta San Pablota Jiojtekähui Jume Galatammehui

Teboteri

1 ¹Ínapo, Pablo, jü apóstol, yeu púari të kaa yorem bétana éntok kaa yoremem júnel eäpo, ál-la Jesucristota ínel eä béchïbo, éntok juka Dios Achayta, ä jïabitetuakamta kókkolam násuku. ²Ínapo éntok síme huame hermaanom ínomak aneme, Cristota súaleme Galaacia buiärapo jomemmeute tebote. ³Jü Diosta tü eäü éntok yánti anhuame enchimmaktunake, Dios Átchay, éntok itom Señor Jesucristota bétana huéeme. ⁴Áapo ito béchïbo kia áu tójjak itom Dios bejrim béchïbo, huaka kaa türík én ániat ayukamta bétana itom búttia báreka, itom Dios Áchayta ehuä pámani. ⁵Áapörík béchïbotunake jü lóoria éntok nat tómti cien huásuktiriampo éntok jíba junëli! Júnentunake.

Huépü evangelio jíba aayuk

⁶Karane ä sualeka tahuala läuti enchim ä omoutekähui juka enchim núnukamta, tü eaka Cristota huämi, täbui evangeliota

guojaa báreka. ⁷Kaa täbui evangelio ayuk jíöbe. Ál-la huate enchim jijïoptuame aane, éntokim Cristota evangelio nasonte báareme aane. ⁸Të ítapo junne, o huépü ángel téhueka bétana huéeme, enchimneu ä nokayo senu evangeliota täbuiasi huémta kaa itom enchimneu nokakähui, bette noki át chúpátunake.

⁹Bát itom jíakä bénasi, enne júchi ínel jiaahua: Senuk täbui evangeliota enchimneu nokayo kaa enchim mabetakäu bénasi huémta, júnaasi noki bette át chúpátunake.

¹⁰Bueítuk, ¿jachu ínapo én jume yoremem nee al-leetuanakeu jaria ö Diosta nee al-leetuanakähui? ¿Jachune jume yoremem al-leetua báreka éiya? Bueítuk ínapo jume yoremem al-leetua báreka éätek, kanne Cristota nésauleerotu éiyey.

Pablota tékia

¹¹Tëne ikäi enchim júneetua, hermaanom, jü evangeliota ín enchim téjhuähui, kaa yoremem nésaupo bétana huéiye; ¹²bueítuk ínapo kanne jábe yoremta bétana

ä mabetak, éntokne kaa jábe yoremta bétana ä täyak ál-la Jesucristota inou yeä machiriakä béchibo.

¹³Bueitukem béja ino bétana ä jikkaj-la, jáchin ín ino nukähui huamei taahuarimmechĩ judíom ä sualé páman aneka. Kaa huéeläsi éaka jume Cristota sualhuäpo nau animne guojajaseka, ám lútia báreka eiyay. ¹⁴Moiséjta leypo anekane juebenam inobeu kateme ámpatne chë huéiyey, jü ín naciompo juka ín yoiyoturim religióntane kaa huéeläpo nákeka. ¹⁵Të Dios ínel nee yeu púhuak ín áiye tómpo naateka, éntok hua ä tü éeri béchibo nee núnukame. Huanäi, áapörík ínel ä huatia béchibo, ¹⁶ä Üusi inot yeu bíttebo báreka, nee áa bétana nok iaaka huame kaa judíom násuku. Íari bétanane, kanne yoremtau nátemajek, ¹⁷éntokne kaa pueblo Jerusaléniu jikau siika, jume bannaataka ínopat apóstolimtukaihui. Ál-lane Arabia buiärau bíchaa siika,


éntokne júchi nóttek pueblo Damascohui.

¹⁸Chúkula, báij huásuktiriam simsukne pueblo Jerusaléniu jikau siika, Perota bít báreka. Huanäine quince taahuarimpo áamak áma anek. ¹⁹Tëne kaabeta huame huate apóstolim bitchak, Jacobota jíbba, juka Señorta saila. ²⁰Ími ín enchimneu jiojtëpo, Diosta bíchäpone aane: Kanne ára nókichi.

²¹Chúkula, Siiria buiärau nee bíchaa siika éntok Ciliiciahui. ²²Huame Cristota sualhuäpo nau anim Judea buiärapo joomem, katim nee bít täyay. ²³Kíalim ínel jíayhuamta jikkajlatukay: “Huä bannaataka itom guojajaseihui, én huaka Cristota súalhuamta bétana nooka, bannaataka ä tejal báreka eaihui.” ²⁴Huanärim tepam Diosta úttileka taahuak ino béchibo.

*Jume apóstolim juka
Pablota mabeta*

2 ¹Chúkula béja catorce huásuktiriam simsuk,



(Gálatas 2:1)

júchine Jerusaléniu jikau siika Bernabétamaki, juka Titota két ínomak huériaka. ²Tëne áman jikau siika Diosta nee ä jüneetuakä béchïbo. Huame chë yörihuamene jïba téjhuak éhuili bempölaime, juka evangeliota, kaa judíom násuk ín nokähui, kaa kía kaitäpo juka ín tékilta tahuanakë béchïbo. ³Të Titota, ínomak huémta, ä griegotukä násuk junne, katim útteapo circuncisiónta ä yáaria bábarek. ⁴Bueítuk, jume emo hermaanom tíame éhuil ito násuk kimulame, itom búttiarita Cristota bétana itom jípurëu itom úhuhua báarey, júchi bénasi sumataka itom tahuaria báarei. ⁵Huámëhuíte kía chúbala júne kaa ito tójjak, huaka evangeliota lútüriata itom téjhuamta jïba enchimmet ayunakë béchïbo.

⁶Të ímëi kaitam bemelasi itou ettejhuak huame chë áma yörihuame bannaataka kía jita am tékiak júne; ínapo kaita áma jüneria, bueítuk Dios nánancha itom bitcha. ⁷Ál-lam al-leaka taahuak, juka evangeliota kaa judíom kaa circuncidaruarimme béchïbo ín mákhuakau bétana, Perota két jume judíom circuncidaruarime béchïbo ä mákhuaka bénasi. ⁸Bueítuk Dios Perota apóstolpo yeu púakame circuncidarualamme béchïbo, két nee yeu púhuak kaa judíom béchïbo kaa circuncionta jípuremmehui.

⁹Huanäi, Jacobo, Peero, éntok Juan, jume áme násuk tua kóba yoiyötürimpo ériahuame, juka Diosta tü eäu ín mákhuakamtam

ä bej yauhuak junëli bem ä türeka tahuaka bétana báta mámammeyim itom mám buíssek neechi éntok Bernabéta. Itom náu rejtinake ti jiaka, itapo jume kaa judíommehui, bempo éntok jume judíommehui. ¹⁰Kía jïbam huame poloobemmeu itom huáati sáhueka nookak. Jukarine éntok ínapo kaa ä koptiaka ä johua.

***Antioquíapo Pablo Perotau
kuttílasi nookak***

¹¹Të juka Perota pueblo Antioquíau yepsak, anä béj-reka nookak ä pújibapo, bueítuk ä joähui tepa kuttílasi áu nokpo machisi aaney. ¹²Bueítuk kee jume Jacobotamak kateme áu yájjay, kaa judíommak jïjïbuäy, të huamei áu yájak éntok kaa judíommeu áu yeu huíkeka Jacobotamak katemmeu bíchaa ä huériu táytek, jume judíom ä májhuë béchïbo. ¹³Huanäi jume huate judíom két alë bénasi aneyo. Júnëli két Bernabéta júnem aman huíkkek, jum kaa lútüriata bem joaïpo. ¹⁴Tëne kaa tüisi bem katëu jünë eriaka, huam lútüria evangeliota itom ä téjhua pámani, Perotaune ínel jiaahua simem jíkkajäpo: “Empo judíotaka junne, kaa judíom bénasi jíápsa, kaa judío ténasi. ¿Jatchiaka júntukë útteata am joria, jume kaa judíom, judíom bénasi emo am nü íaaka?”

***Jume judíom, simem bénasim,
Diostat ehuäpom jinëuri***

¹⁵Ítapo judíomtaka tómtila, kaa juénasi anhuäpo aneka yóremtaka kaa judíom násuku. ¹⁶Júnëli

jünéaka, juka yoremta kaa juka Moiséjta ley ä joä béchïbo Diosta bíchäpo kaita kúlpaka tüisi ä tahuähui, ál-la hua Jesucristota súalëubeyi. Juäri béchïbo ítapo két Jesucristota súaleka kaita kúlpakate taahua, áapörík súalhuamta itom jípurë béchïbo, kaa hua leyta nésahueu itom joä béchïbo, bueítuk hua leyta nésahueu johuamtay kaabe kaita kúlpaka tatahua.

¹⁷Të én, ítapo juka kaita kúlpahuamta Cristotat jariaka, juëna yörememtaka téurituk junne, ¿jachu huäri béchïbo Cristo kaa türiu tékiak? ;Huitti nokhuäpo, ëe! ¹⁸Bueítuk jita júne ín mójaktiakäu júchi bénasine ä joätek, huanäi ál-lane kulpaka tatahua. ¹⁹Jü ley nee mäak, én éntokne mukila äa béchïbo, Diosta béchïbo ín jíapsinakë béchïbo. ²⁰Cristotamakne kúrusit poponri. Énne kaa ínapo jíäpsa, të ál-la Cristo ínot jíäpsa. Huanäi én jum huakajpo ín jíapsähui. Diosta üusibetne eaka imi jíäpsa, hua nee nákeme, éntok ä mukëpo tájti áu tójakame, ino béchïbo. ²¹Bueítuk, kanne, Diosta tü eäü omoute; bueítuk Moiséjta ley kaita kúlpaka yore ä tahuariayo, bueítuk ä junëlituko, kaita béchïbo muukuk, jü Cristo.

*Jü Espíritu Santo Dios
ehuäpo mamabethua*

3 ¹Eme Galasiapo yoremem kaa susuäram, ¿jábesu enchim náyotek, juka lütüriata huë paman kaa enchim át kannakë béchïbo? ;Sime iri

machisi enchimieu nokhuak, juka Jesucristota kúrusit poponhuaka bétana! ²Íkäi, jíbane enchim bétana, jüneria báare: ¿Jáchisem juka Dios Espírituta mabetak jachu juka leyta nésau joaka jäni, ö ä sualeka ä jikkajakari? ³¿Tepem tokti kaa susuak? ¿Espíritu Santopo naatelataka én éntokem enchim úttiäray ä chúpa báare? ⁴¿Jachu juebenak jikot machika enchimieu simlame? ;Tua lütüriapo kaitäpo enchimieu sika! ⁵Dios Espírituta enchim mákakame, éntok kaa jaibu johuamta joame enchim násuku, ¿jatchiakasu ä johua? Kaa juka leyta nésahue paman enchim katë béchïbo, të ál-la enchimieu nokhuakamta súalekä enchim ä jikkajakä béchïbo.

*Jü Diosta nooki Abrahamtamak
núu lütüria yáari*

⁶Jünëli Abraham Diosta ä súalekä béchïbo, Diosta bétana lütüla jíapsihuamta mabet-la. ⁷Juäri béchïbo, emë ä jüneria jume Diostat eäme, ímëi ínel jume tua Abrahamta üusim. ⁸Juka chúkula bát bíchaa hueenake bétana jü jïojteri ínel nooka, huame kaa judíom ä tü tátabnakëhui bem ä súalekä béchïbo, juka Abrahamta téjhuak, juka chúkula huenakemta bétana ínel jáaka: “Emo béchïbom tühuata jájamnake huame sime ániat jíäpsame.” ⁹Jünëli huame ä súaleme béja tühuata jájamla, Abrahamta ä súaleka ä jájamekä bénasi.

¹⁰Bueítuk síme huame Moiséjta ley nésahueu joaka túhuata emo jájam máchileme, nokta béttesi machik bétukim jíapsa, bueítuk ínel jïojteri: “Juënasi noki át chúpapunake, síme huame kaa jíba hua libro leyta nésahue paman ä joaka jíápsame.” ¹¹Éntok tua jünakiachi, huam, kía jábe júne Diosta bíchäpo kaa lútüla jíapsihumta jájamnake leyta nésau ä joä béchïbo; bueítuk ínel jiaahua jü jïojteri: “Huä lútüla jíapsihumta jájamlame ä súalë béchïbo jíapsinake.” ¹²Huä ley éntok kaa át ehumta bétana huéiye, ál-la ínel jiaahua: “Huä ikäi yáakame, juka ä yáakä béchïbo jíapsinake.”

¹³Cristo itom jínëuk jü noki béttesi leyta itot chúpavituk junne. Jü juëna nokta itot chúp ääuta, áapo itom ä úhuak; bueítuk ínel jïojteri: “Júnnaasi noki ámet chúpila, síme huame kútat jikat cháahuaka mëhuakame.” ¹⁴Íri ínel yeu siika, jü túhua Abrahamta mabetakähui jume kaa judíom ket ä mabetnakë béchïbo, Jesucristota huämi; éntok juka Espírituta Diosta itom téjhuaari itom ä súaleka itom ä mabetnakë béchïbo.

Jü ley éntok jü itom ä makrokakä nokakähui

¹⁵In hermaanom, enchimmeune nok báare yorem éeripo: Noki náu lútüria yáari, yorem yáataka junne, të firmata át yéchahuako, kaabe ára kaitäpo ä tahuaria, éntok kaabe kara huate nokta áu rúktia. ¹⁶Én, türi, Dios

Abrahamtau nookak éntok huaka át yeu simnakemtau kétéchi jáchin juka chúkula áu ä yáanakëhui. Të jü jïojteri kaa ínel jiaahua: “huame emót yeu sakanakemmehui”, juebenam bétana nokamta bënasi; ál-la ínel jiaahua: “emót yeu simnakemta”; iri éntok ínel jiaubáare huépül yoreme jíbba, iri jü Cristo. ¹⁷Ínëline enchimmeu jiau báare: Dios nokta yétchak, Abrahamtamaki, éntok ä lútüriatek. Kíalíku Moiséjta ley, naiki cien áma treinta huásuktiriam huéy yepsak, iri ley yáahuakame kara kaitäpo ä tahuaria juka nokta kësam huëpo Diosta lútüria yáakähui. ¹⁸Bueítuk juka Diosta itom máknakeu Moiséjta ley bétana ä huéy, kaa Diosta itom ä mik rókakäu bétana huéiye. Të Dios Abrahamta ä mák báreka taahuak, ä nokakäu chupa báreka.

¹⁹Huanäisu, ¿jita béchïbosu türi jü Moiséjta ley? Chúkula äu rúktiahuak, kaa túhuata ayukä béchïbo, huaka át yeu simlata äbo yepsäu tájti, huaka mikbahua téjhuarita; éntok Diosta ángelesim ä yáatuahuak. Jü Moisés éntok mediadorpo násuk kíktek. ²⁰Të juka senuk huépülatuk jíbba, kaabe ára áme násuk kíkte; bueítuk Dios huépülai jíbba.

Leyta, ä jita béchïbotukähui

²¹¿Jachu jü Moiséjta ley Diosta itom makrokau ä bej-reka nooka? Huitti nokhuäpo, ëe. Bueítuk juka leyta ára jíapsihumta yore míkái, kaitate kúlpaka tahuaria éiyey, juka ley nésauta joaka. ²²Të símem

Diosta bejrimpo páttiaritaka taahuak, hua Diosta jiojteripo huämi. Júnelite ä mabetnake, huaka Diosta itom ä mik bárëhui, Jesucristotat ehuäpo huämi.

²³Të kee huaka Diostat eaka yeu machiayo, leyta bétukte pereesotaka aaney, huaka tua Diostat ehuamta yeu machinakeu núkisi. ²⁴Júnëli jü ley hua itom suayaïhui, Cristotau itom huéria báreka, Diosta bíchäpo kaita kúlpaka itom tahuaria báreka, Jesucristota súalhuäpo huämi. ²⁵Të juka tua súalhuamta yeu machiak, béjate kaa hua itom suayamta bétuk jíapsa.

²⁶Bueïtuk síme eme Diosta üusiem, Cristo Jesústat enchim eä béchïbo; ²⁷bueïtuk síme eme Cristopo batörim; éntok Cristo nat béppa lómti enchim sankotuala. ²⁸Íari béchïbo, béja kaabe judío éntok griego junne; kaabe búttiari, kaabe súmari; kaabe öou éntok jámmut junne; bueïtuk simetakem huépülay Cristo Jesúsopo. ²⁹Eme Cristota átteamtuk, lútüriapo Abrahantachem yeu sákala; éntokem áamak ä átteak, juka Diosta áamak nokta yéchakähui, Áapörík ínel jíakä béchïbo.

4 ¹Tëne kët ínel jiaahua: Huä herenciatamak tahuasemta ketune ílftchiako, hua tekipanualeero chäka jípuhuamta bénna, elaposu síme herenciata attiak. ²Ál-la hua ä majtiamta éntok ä suayamta bétuk áu jípure, huaka ä áchayhuata taahuarita ä yéchakäpo tájti. ³Alë bénasi, ítapo këtchi, usi kaa yöhueta bénasi, hua kësampo ím ániapo itom

majtiahuamta bétuk ito jípurey. ⁴Të huaka taahuata yúmak, Dios ä üusihua äbo kóm bíttuak, jámuttat yeu tómtilatata, éntok leyta nésahueu bétuk jíápsaka, ⁵huame símem leyta bétuk tua kateme am búttia báreka, ä üusimpo itom mabet báreka.

⁶Dios juka ä Üusihua Espíritu itom jíapsiu kom bíttuak, itom jüneenakë béchïbo itom Diosta üusimtukähui; jüri béja ínel jiaahua: “¡Abba, im Pa!” ⁷Júnëli enë kaa hua jóapo sáyhuame, ál-lë usiari; enë ä üusitaka, Diosta bétanë huaka nokta náu chúpari attiapu mabetnake, Cristota huämi.

*Pablo jume Cristota
súalemmet kaa yuumay*

⁸Lútüriapem, bannaataka juka tua Diosta kaa täyaka, jume kaa tua diosim nésautem johuay. ⁹Të ëni juka tua Diosta täyaka, ö chë tüisi nokhuäpo, Diosta áapörík enchim ä täya béchïbo, ¿jatchiakasem júntuk júchi bemelasi áu nótti báare, hua ím ániat kaa útteakamtahui éntok kaita béj-remtahui, áa bétuk jíapsi báreka? ¹⁰¡Bueïtukem taahuarim éntok meechem pajkoria, tiempom, éntok huásuktiriam! ¹¹Í éeritne kaa yuuma: Jamakne kía kaitäpo enchímmet tekipanauak.

¹²Enchimmeune nooka, ín hermaanom, ino bénasi enchim emo nünakë béchïbo, judíotaka júnene kaa judío ténasi ino nüka enchim násuku. Kaitem juënak inou yáala. ¹³Eme jüneiä, ín kökoata takahuapo ín jípurekä

béchībo, juka evangeliotane enchimneu nookak, kēsam huēpo. ¹⁴Katem kaitāpo nee bitchak, éntokem kaachin nee ériaka taahuak. Jü ín kökoa kaa täbuiasi enchim éetuak; ál-lem tüisi nee mabetak, nee Diosta ángeltukäu bénasi; o nee Jesucristotukäu bénasi. ¹⁵¿Jáksu júntuk ayka, hua al-leeri jiápsipo enchim ínnëakähui? Bueítukne ínel enchimneu jiaahua, eme áma yúmakátek enchim pusim júnem yeu guótiä éiyey, nee am mik béchībo. ¹⁶Én chēhua, ¿jachune huaka enchim inou omtēu áma yöok, kía lútüriata enchimneu ín nokä béchībo?

¹⁷Ímëi yoremem tüisim enchim básule, tem kaa tü éerita enchimneu bíchaa jípure. Ál-lam itom näikimte báare, bempörim jíba enchim am éria íaaka. ¹⁸Ket jiaulāpo, türi emo básulhuāpo, tē tü éeripo jábetau tühuata yáa béchībo; tē kaa chúkteka, kaa nee ímí aney jíbba. ¹⁹In usiälam, júchi bénasine huantiriata ínnëa, jámutta abe asoamta bénasi; íkái huantiriata jíbane ä ínnëake, Cristota enchim jiápsipo yötüu tájti. ²⁰¿Tepane enchimmak an péiya, én seepi, täbuiasi ée béchībo, bueítukne enchim bétana búruk éiya, éntokne guómtilata bénasi ino ínnëa!

Sarata éntok Agarta ejemplo

²¹Nechem téjhua, eme jume leyta bétuk an báareme: ¿Jachem juka leyta kaa jikkaij-la? ²²Bueítuk ínel jiojteri, Abrahamta guoy úusim bétana: huépülak jü

jámut jóapo sáyhuamta bétana, senuk entok ä jóapo jometukay. ²³Huä, jámut sáyhuamta bétana huéeme, yoremraata éerit bétana huéiyey; tē hua, jámut jóapo jometa bétana huéeme, Diosta ínel jáká béchībo yeu tómték. ²⁴Íri ejemplo tüisi béttesi machik itom téjhua; ímëi guoy jáamuchim guoy náu nok-rita yore majtia. Jü seenu jum Sinaí káupo náu nok-rita bétana nooka; huári jume usim jóapo sáu béchībo jípure; íri jü Agar. ²⁵Bueítuk jü Agar juka Sinaí káu Araabia buiärapo kátekamta ejemplo, éntok jü Jerusalén én huémta bétana nooka, bueítuk íri ä úusimmak náu sáyhua. ²⁶Tē jü Jerusalén jikattana huéeme, hua simem itom áyekähui, kaa sáyhua. ²⁷Bueítuk ínel jiojteri áa bétana:

Al-leäe, empo kaa asoame, kaa usim jíjipureme;
al-lerimmeyë kusisë cháchaye,
empo jámmut asoamta huántiriam kaa ínnëlame;
bueítukim chē búru jume jámut jímmarita asoam,
kunakamta asoam béppa.

²⁸Júnëli, ín hermaanom, ítapo Isaacta bénasi, Diosta ínel jiaulä béchībote ä úusim. ²⁹Tē két júnakoy bénasi hua yorem éehuamta bétana yeu tómtilame ä guo jájjasey, juka Espíritu Santota éäpo yeu tómtilata; én két ánëli. ³⁰Tē, ¿jáchisu jiaahua jü jiojteri? Ínel jiaahua: “Jukë jámut jóapo sáyhuamtē yeu béeba, éntok ä asoahua, bueítuk juka jámutta jóapo jometa asoammak nokta yéchata bétana kaita jípure.” ³¹In hermaanom, júnentukte kaa hua

jámut jóapo sáyhuamta asoam,
ál-la hua kaa sáyhuamta asoamte.

Búttiataka jíbem jiápsa

5 ¹Cristota enchim
búttiakápem óusi jábue.
Katem éntok áman nonnotte, jum
tekoka sáyhuaka jíapsihuähui;
ál-lem jíba búttiataka jíápsa.

²Én éntok ínapo, Pablo,
enchimne téjhua, enchim emo
circuncidaroy Cristo kaitápo
tahuanake enchim béchibo. ³Júchi
éntokne ä nooka, síme yoremem
emo circuncidaroommehui,
úttea síme leyta nokä páman
bem kannakëhui. ⁴Cristotem
omoutela, eme jume leyta nokä
páman kateka emo tüisi tahuä
tíame; Diosta yore nákepem kóm
huáttila. ⁵Bueítuk ítapo Cristota
súaleka kaita kúlpaka tahuanake,
Diosta bíchäpo, Espiritu Santota
huämi. ⁶Bueítuk jü Cristo Jesúspo
kía hua circuncisión kaíta béj-re,
éntok kía hua kaa circuncisión
junne, ál-la hua yore nákuhame
súalhuamatat bétana huéeme.

⁷Eme tüisi kaatey. ¿Jábesu
enchim jioptuak, kaa jum
lütüriata huë páman enchim
kannä béchibo? ⁸Íri enchim
kuaktiahuakahui kaa hua enchim
núnkamta bétana huéiye.
⁹“Ilikki levaduura síme juka
tujta bika mamana.” ¹⁰Të kíalíku
ínapo enchimmet jíápsék, Señorta
huämi, kaa täbuiasi enchim
éenakë béchibo. Të hua enchim
jioptuamtat jü nooki béttesi áa
béppatunake, kía ä jábétuk junne.

¹¹Entok ínapo, ín hermaanom,
ketune huaka circuncisiónta

bétana nokätek, ¿jatchiakasu
jume judíom ketune nee guo
jajjasé? Júnëlitukätek hua kúrus
át tëitihuame kaitatü éiye. ¹²Türi
éiyey, ¡huame enchim jjiioptuame
emo kápontebokätek!

¹³Bueítuk eme, ín hermaanom,
kaabeta bétukem emo jípu
iaahuaka núhuri. Kía jíbem huaka
búttiarita enchimneu yáari kaa
hua juënaraata enchim jonákë
béchi'bo ä jípure; ál-lem nánancha
emo nésauta joria emo nákeka.
¹⁴Bueítuk síme jü ley íri huépu
nokpo chúpanake: “Emou jëla
anemtë nákke, em emo náké
bénasi.” ¹⁵Të eme nánancha emo
kekkëtek éntokem emo buäyëtek,
jitachem suuhua; kolopti jünem
nánancha emo lütianake.

*Takahua éerim éntok
Espirituta éerim*

¹⁶Inelne jiaahua: Diosta Espiritu
Santopem naa kuakte, katem
juka enchim kaa tü éeri ukulëuta
johua. ¹⁷Bueítuk jü huakajta
ukulëu jü Espiritu Santota
béj-reka huéiye; jü Espiritu
Santota ukulëu éntok, jü huakajta
béj-reka huéiye. Ímëi éntok náu
emo béj-re, Bueítuk enchim
huáatiäu kaa enchim yáa äaka.
¹⁸Të jü Espiritu Santota enchim
huériay, katem Moiséjta ley bétuk
emo jípure.

¹⁹Jünakiachi, huame huakajta
yore jotuähui; ímëi ájaria: hua
jubiarita nat ukulhuame, kaa
jubeka ä jípureme, jaiti máchirat
jíápsame, kaa tíura, ²⁰diosim
tíame yörihuame, mória, náu
omtihuame, náu nássua-huame,

näi búkhuame, kujteehuame, náu nok nássuahuame, kaa nánancha éehuame, Diosta nok-läu täbuiasi ä majtياهوame, ²¹senukut átteata innëhuame, yore súahuame, vino jihuame, kaa túrata huéetua béchïbo pajkohuame, éntok huate jítasu ayka ílë bénaka; fári bétanane enchim téjhua, bannaataka ín enchim téjhuaka bénasi, jume íkái joame kaibum áma náikiatuna, jum Diosta reyataka nésahuapo.

²²Të hua Espíritu Santota hueriähui, ïri ájaria: jü yore nákhuame, jü al-lee-huame, yánti jíapsihuame, kaa naa múksi éehuame, náu türi jíapsihuame, náu tü éehuame, chíkti ä jíapsimak jita súalhuame, ²³kaa béttek jíapsihuame, emo yüihuame; kaita ley ímëi bėj-reka nooka. ²⁴Të jume Cristota átteam bem kaa tü éerimim kúrusit poponla, jita bem ukulëumak náuhui. ²⁵Espíritu Santota úttiäray jíapsáteko, Espíritu Santota itom huéria pámanate ket rejtinake.

²⁶Katte ito buere érianake, náu ito múksireka, senuk täbuik átteata nat innëaka.

Simetakem emo aania

6 ¹In hermaanom, jábe jak kaa tühuata joaka téihuak, eme chë Diostau jëla emo anleme jíapsita tutti yéchalataka, áhuem nooka kaa béttesi, júchi ä jíapsi kuaktinakë béchïbo. Të áachë suaka, emo temaje; katë áma huénnaake, jum em rútuaktia bárëhui. ²Náhuem emo aniaka

ä huéria juka huatem hueriähui, huaka béttesi maachik; júnëlem Cristota nésauri yáanake.

³Bueituk jü kaita bėj-reka júne áu jábeleme, kía áu bätättähua. ⁴Eme enchim tékil yáaribechem suuhua, huanäi ä türiako are ái emo úttile, kaa täbui tékil yáaribechi. ⁵Bueitukte hueuhuëpulaka ä huérianake juka ä tékilhua.

⁶Huä tü nokta majtياهوakame, síme türi máchikui ä anianake, huaka ä majtiakamta.


⁷Katem emo bätättähua; Dios kara junneriatu. Síme hua yoremta echakäu, huákái toboktianake. ⁸Júnëli béchïbo, jábe junne ä huakas takahua béchïbo jíba echáteko, ä huakajtabét aneka kókkohuamta áma chupanake; të jábe júne Espíritu Santota béchïbo echáteko, Espírituta bétana jíba béchïbo jíapsihuamta áma chupanake. ⁹Kíalíkute kaa lottinake, tühuata joaka; bueitukte taahuarita yúmak jíchupanake, kaa kóm ëeako.

¹⁰Júnëli arä yátek, áma yumáteko símemmeute tühuata yáanake, të chë júne huame Cristota súalhuäpo itomak huérim.

San Pablo Cristota kúruijbei áu úttile

¹¹Áachem suuhua, jáchisune bueere leetrammea enchimmeu jïojte, ín mámammea.

¹²Jume úttiapo enchim emo circuncidaröä iaame, kíalim yoremtamak huakajpo tüisi tahua báreka, enchim ä yáa ía, kía hua Cristota kúrus béchïbo



(Gálatas 6:11)

kaa bem guo jájjanä béchibo.

¹³Bueituk kía huame emo circuncidaroame katim leyta jáä páman kaate; tem enchim emo circuncidaroä íaa, enchim huakasiy emo úttil báreka.

¹⁴Të mékka inou ayunake, jü ín ino úttilnakëhui; të jü Señor Jesucristota kúrus mukukäubéy jábba. Bueituk Cristota kúrus huämi, hua kaa tühua ím ániat ayukame ino béchibo kúrusit poponri; ínapo éntok huákäi béchibo két kúrusit poponri.

¹⁵Kíaliku jü circuncisión kaita béj-re, hua kaa áu circuncisiónta yáarialame junne, ál-la chë

béj-re hua bemelasi yeu tómtihuähui. ¹⁶Yánti jápsihuame éntok yore jiokorihuame áme béchibotunake, síme huame ínëli emo nüyemmehui, éntok Diosta gente Israelihui.

¹⁷Én bát bíchaa kaabe nee múksi éetuanake, bueituk ínapo ín takahuapo ä huéria, juka señata Señor Jesústa béchibo kókosi ín yáahuakapo.

Tü nooki ámet chúpahuame

¹⁸In hermaanom, jü itom Señor Jesucristota tü éeri enchim espíritutamaktunake. Júnentunake.